

四庫全書

集部

欽定四庫全書總目卷一百八十四

集部三十七

別集類存目十一

湖海集十三卷

山東巡撫  
採進本

國朝孔尙任撰尙任有節序同風錄已著錄尙任官  
國子監博士時隨侍郎孫在豐在淮揚疏濬海口  
因輯其入淮以後詩文自編此集故以湖海爲名

幸跌草三卷

浙江巡撫  
採進本

國朝黃百家撰百家有體獨私抄已著錄是集凡雜

文二十篇其序盧氏春秋三傳纂凡謂春秋之本  
旨皆顯以示人無暗藏機括使人如猜謎射覆者  
深得聖人作春秋之意其王劉異同序亦深見兩  
家之闡奧大致頗肖其父但蒼老不及耳書首題  
曰學箕五稿則卷帙尙多此其稿中之一種耳

眺秋樓詩八卷

浙江巡撫  
採進本

國朝高岑撰岑字峴亭商邱人官豐城縣知縣其詩  
每卷各爲集名終之以和月泉吟社田園雜興六  
十首岑爲吏部尙書宋犖外孫故其詩法亦本於

肇與宋至緯蕭草堂集體格相近所謂酷似其舅者也

赤嵌集四卷

兩淮馬裕家藏本

國朝孫元衡撰元衡字湘南桐城人康熙中官至東昌府知府是集皆其爲臺灣同知時所作以地有赤嵌城故以爲名多紀海外風土物產頗逞才氣而未能盡軌於詩律王士禎爲之點定謂其追蹤建安躡跡長公一時推許之詞未足爲定評也

四香樓集四卷

江蘇巡撫採進本

國朝范讚撰讚字武功婁縣人其詩源出晚唐而參  
以南宋如蜂憎綠蟻晴偷蜜燕覓青蟲晝哺雛一  
潭水聚三更月四野山圍小閣燈三秋樹老蟬聲  
盡八月江寒雁影遲蟬聲送過秋多少鶴夢憑他  
夜短長之類皆綽有思致而格調未高前有海寧  
陳元龍序稱其長堪興學蓋嘗館於元龍家相傳  
格致鏡原卽其所纂亦博洽之士也

釀川集十三卷

浙江巡撫  
採進本

國朝許尙質撰尙質字又文山陰人是集賦一卷雜

文一卷詩五卷詞五卷宋祖昱序謂尙質少而業詩亦喜飲指邑中所謂沈釀川者自號因以名集其文頗有法律詞亦修整惟歌詩稍嫌放縱或不甚入律云

舟車初集二十卷

浙江巡撫  
採進本

國朝陶季撰季原名澂字季深後以一字爲字又以字行寶應人王士禎漁洋詩話記其與萊陽董樵同以一字爲字因而賦詩定交者是也平生足跡半天下詩多於舟車得之因名舟車集其詩多才

鋒踔厲風發泉湧不爲邊幅所窘然有警句亦有  
率句有健句亦有弱句蓋跌宕有餘而陶鍊未至  
者也

燕堂詩鈔八卷

戶部尙書王際華家藏本

國朝朱徑撰徑字恭亭寶應人喬萊之壻也是集爲  
徑所自編自康熙丙寅至己卯凡十四年之詩緣  
情綺靡頗有格韻特少作居多尙未能盡謝鉛華  
耳

鈍齋文鈔七卷

江西巡撫採進本

國朝楊兆嶠撰兆嶠字又平瑞金人是集前有自序  
謂著文三百餘首次其三之二授諸梓則兆嶠所  
自定也張尙瑗序稱其文似歸有光使汰其冗句  
俗字固亦近之矣

集古梅花詩

無卷數 浙江  
巡撫採進本

國朝張吳曼撰吳曼字也倩上海人居吳淞江上其  
地多梅因爲集句賦咏凡和中峰禪師韻者一百  
首和陳涉江韻者三十首自和者十首又一百首  
則吳曼以同里沈球本有是體爲繼作而合刻之

者又一百首則吳曼六十生日其仲兄文卿取十月先開嶺上梅句集古爲壽吳曼因續爲之者末附集唐梅歌一首乃七十六歲所作殆終身詠此一花也

根味齋詩集二十卷

編修徐天柱家藏本

國朝徐志莘撰志莘字任可一字商農德清人工部尚書元正子以父蔭官順天府通判是編凡趨庭集二卷壯圖集三卷小草集三卷棄擔集七卷起乾集二卷老傅集三卷詩多取法蘇陸不事雕飾

蓋其家學然也

笏峙樓集五卷

江蘇周厚  
堉家藏本

國朝張祖年撰祖年有道驛集已著錄是書釋疑孟一卷以司馬光有疑孟一書而祖年逐條爲之辨廢言四卷則其所自著也中多遊戲之詞與道驛集之正色講學者又殊

觀樹堂詩集十四卷

浙江巡撫  
採進本

國朝朱璋撰璋字鹿田錢塘人由舉人官至澤州府知府其詩爲叱馭集一卷入蜀時作也問絹集一

卷白舫集二卷古廳集四卷皆令江油時作也冬  
秀亭集四卷官澤州時作也剡曲集一卷則天台  
紀遊詩也一半勾留集一卷則憂歸居杭詩也

恕谷後集十卷續刻三卷

直隸總督  
採進本

國朝李塉撰塉有周易傳注已著錄是集所作古文  
也前有其門人閻鎬序稱恕谷者自名其里也後  
集者自康熙癸未以前俱置之而惟存其後焉者  
也集首第一篇爲送黃宗夏序後有題曰此王崑  
繩改本也恕谷初學八大家崑繩言當宗秦漢章

法訂此恕谷後謂唐宋不如秦漢秦漢不如六經  
於文法一宗聖經題曰後集云云崑繩者大興王  
源字也嘗撰文章練要分六宗百家談古文之法  
後與塏同師顏元塏遂從學古文盡棄其少作後  
集之名蓋別其前之所棄也今觀其文根柢仍出  
八家但開合斷續不主故常異乎明以來學歐曾  
者惟以紆餘曼衍爲長耳遽曰秦漢曰六經溢其  
量矣塏天分本高其學自成一家以經世致用爲  
主亦具有根柢然負氣求勝其文或失之麤豪少

古人淳穆之氣其持論又自命太高自信太果幾於唐宋元明諸儒無一人能當其意亦未免傷於褊激蓋前明白萬厯以後心學盛行儒禪淆雜其曲謹者又濶於事情沿及

國初猶存商俗故顏元及瑳獨力以務實相爭存其說以補諸儒之枵腹高談未爲無益然不可獨以立訓盡廢諸家譬諸礫石大黃當其對證實有解結滌滯之功若專服久服則又生他疾耳

東山草堂文集二十卷詩集八卷續集一卷

戶部尚書王際華家

藏本

國朝邱嘉穗撰嘉穗有考定石經大學經傳解已著錄其文頗條暢詩則淺弱集後舊附陶詩箋註五卷邇言六卷又考定石經大學經傳解一卷今各分著於錄俾從其類

在陸草堂集六卷

兩淮馬裕家藏本

國朝儲欣撰欣有春秋指掌已著錄欣以制藝名於時而古文亦謹潔明暢有唐宋家法大致於蘇軾爲近所作蜀山東坡書院記宗旨可概見也其中

如周公太公論撻伯禽辨挾天子辨皆少近迂與  
齡辨則先儒久言之亦不免爲屋下之屋其正統  
辨不取帝蜀之說亦不免失之好辨也

息廬詩一卷

江蘇周厚  
堉家藏本

國朝陶爾穉撰爾穉字穎儒華亭人是集前有曹溶  
序稱其人巧極天工錯顏光敏序稱其七古似青  
蓮長吉近體不專一家而各盡其妙今觀所作大  
抵以才思擅長品格故未能超詣雪美人七律二  
首世所艷稱實則小巧也

陳恪勤集三十九卷

浙江巡撫  
採進本

國朝陳鵬年撰鵬年字北溟號滄洲湘潭人康熙辛未進士官至兵部侍郎河道總督諡恪勤是集凡分十編曰耦耕集者以舍北耦耕堂而名也水東集者以其先人隴墓所在也蒿廬集者憂居前後所作也浮石集胸山集淮海集者皆宦遊地也于山集香山集武夷集者皆往來游息處也未附喝月詞五卷則詩餘也

道榮堂文集六卷

兩江總督  
採進本

國朝陳鵬年撰此本爲鵬年所自編刻於恪勤集之前其生平以清操受

主知詩文非所注意集中亦皆應酬之作更不見所長

固哉叟詩鈔八卷

浙江巡撫  
採進本

國朝高孝本撰孝本字大立號青華嘉興人康熙辛未進士官績溪縣知縣孝本雖年屆四十始爲詩然罷官後放浪山水以老故其詩灑落有清氣但深厚不足耳是編分十七集曰趨庭集曰江漢集曰徑山集曰琴溪集曰嶺南集曰秦遊集曰大鄣

集曰葛園集曰晉遊集曰津門集曰南州集曰幔  
亭集曰海岱集曰黃梅集曰台雁集皆孝本七十  
八歲所自編爲雍正丙午以前詩至丁未又編其  
病中所作爲維摩集附十七集後故自序但列十  
七集云

葛莊詩鈔十三卷

內府  
藏本

國朝劉廷璣撰廷璣有在園雜志已著錄其詩以陸  
游爲宗在園雜志嘗自記其呼童不至自生火待  
飲未來還讀書一聯或以爲勸襲陸游童去自埋

生後火飯來還掩讀殘書句自辨其用意不同是  
固誠然奪胎換骨要不能謂不出於游也又自  
記有人評其詩曰此亦出入於香山劍南之間而  
未純者自以爲允可謂自知矣

葛莊編年詩

無卷數 江西  
巡撫採進本

國朝劉廷璣撰葛莊詩鈔止於官九江道時是編又  
其官淮徐道時所作分年排次起康熙丁巳止於  
壬辰後復有補遺一卷

咸齋文鈔七卷

浙江巡撫  
採進本

國朝查旭撰旭字咸齋海寧人康熙癸酉副榜貢生  
是集凡書一卷序二卷祭文一卷論一卷傳一卷  
襍著一卷旭有孝行嘗於兵亂中崎嶇萬里尋父  
遺柩士論稱之其文源出南宋頗清雅有法度使  
假之年尙可追古作者前有益都趙執信序作於  
旭在之日又有楊中訥序則旭沒後所作也

水齋文集四卷

浙江巡撫  
採進本

國朝懷應聘撰應聘字莘臯秀水人是編刊於康熙  
癸酉蓋所自編皆散體古文而時文選本之序最

多

清端集八卷

江西巡撫  
採進本

國朝陳瓚撰瓚字文煥一字眉川海康人康熙甲戌進士官至福建巡撫謚清端是集凡文七卷詩一卷皆非當行然瓚居官以廉介稱其節概足以自傳亦不必以文章傳也

夢月巖詩集二十卷

浙江巡撫  
採進本

國朝呂履恒撰履恒字元素號坦菴河南新安人康熙甲戌進士官至戶部侍郎此集乃雍正乙巳其

姪纘曾等校刊詩以體分末附詩餘二十四首前  
有凡例稱其詩或經歲一改或一月數改如洛陽  
秋思河上寓目詩之領聯嫌其調近七子輒加竄  
易金陵襍感之結句嫌其涉於怒罵亦復易之又  
稱

盛朝詩選載其秦中懷古詩洛陽秋思詩懷公毅詩  
字句皆有所竄亂今悉從原本云云或刊板時有  
所點定歟

冷古堂文集五卷

浙江巡撫  
採進本

國朝呂履恒撰是集爲履恒歿後淳安方棨如及其  
門人石屏張漢所選定凡一百九十二篇每篇各  
有評語如制義之式

雪鴻堂文集四卷

山東巡撫  
採進本

國朝李鍾璧撰鍾璧號鹿嵐通江人檢討蕃之子也  
康熙丙子舉人官平南縣知縣考古來集部之名  
往往相複然無一家之中共一集名者惟呂本中  
呂祖謙俱稱東萊集然祖謙集加太史字以別之  
見文獻  
通考又洪巖虎及其子希文皆名軒渠集然希

文集加續字以別之非竟相同鍾璧之父蕃有雪  
鴻堂集已著錄而鍾璧此集仍以雪鴻堂爲名父  
子竟無所別亦未有之規例也其詩皆信筆揮灑  
於聲律多未能諧疊韻詩九十一首尤多累句自  
序謂隨手塗抹長短得失在所不計諒矣其文亦  
惟意所如如與陳敷相書引原憲貧也非病之語  
至以聖賢爲戲更軼乎規矩之外矣

克念堂文鈔二卷

江蘇巡撫  
採進本

國朝雷鐸撰鐸字伯覺蒲城人康熙丙子舉人陝西

通志稱其事繼母孝負米他郡以養遇水幾溺嘗終日不食不致母缺於供家雖貧養從兄弟及寡姊妹不少懈朔望聚族人習禮講法以相勸勉蓋亦篤行之士其文章則以人存之耳

殘本賦清草堂詩鈔六卷

江蘇巡撫  
採進本

國朝張棠撰棠字吟樵華亭人康熙丙子舉人官至桂林府知府告歸後加銜爲太僕寺少卿是編原分五集曰白雲吟曰一肩吟曰獨宜吟曰江上吟最後所作曰雪篷吟今存者惟江上吟及雪篷吟

餘俱散佚其詩欲以風調勝而骨幹未遒

山舟堂集十二卷

江蘇巡撫  
採進本

國朝周士彬撰士彬字介文婁縣人康熙丙子副榜貢生世居千山其山舟堂額猶趙孟頫手書也此集凡古今體詩一千餘首乃其子忠所等所刊其論詩以真樸爲主尤喜讀宋儒語錄故所作如存心養性須常靜莫負吾家太極翁之類皆白沙定

山派也

湛園未定稿六卷

浙江巡撫  
採進本

國朝姜宸英撰宸英有江防總論已著錄此本爲其  
未入書局以前所自定不及大興黃氏本之完備  
以別行已久姑附存其目

真意堂文稿一卷

浙江巡撫  
採進本

國朝姜宸英撰此本前有秦松齡序言宸英奉纂修  
之

命治裝北上裒爲此集蓋其中年所作初出問世之本也

苑青集

無卷數 浙江  
巡撫採進本

國朝陳至言撰至言字山堂一字青厓蕭山人康熙

丁丑進士官翰林院編修早年與同郡張遠齊名  
毛奇齡稱其能守古人三義八法之意而不變今  
觀所作以藻縟爲主音繁節壯頗似西河集中語  
宜奇齡之喜其類已也

華鄂堂集二卷

江蘇周厚  
堉家藏本

國朝周彝撰彝字策銘婁縣人康熙丁丑進士官翰  
林院編修其詩喜作長篇如送張長史君山玩雪  
遊江心寺諸作皆灑灑千言才鋒橫溢然律以和  
平之義往往有乖後附研山十咏別爲一卷蓋刊

成之後又續入者也

樸學齋詩集十卷

福建巡撫  
採進本

國朝林佶撰佶有甘泉宮瓦記已著錄佶工於楷法  
文師汪琬詩師陳廷敬王士禎琬之堯峯文鈔廷  
敬之午亭文編士禎之精華錄皆其手書付雕廷  
敬士禎之集皆刻於名位烜耀之時而琬集則繕  
寫於身後故世以是稱之茲集古體詩三卷今體  
詩七卷淵源有自故體格猶爲近古特才分差弱  
出手微易耳

柳塘詩集十二卷

浙江巡撫  
採進本

國朝吳祖修撰祖修字慎思吳江人是集乃康熙己卯其子大庚所編後有大庚跋稱祖修在時曾板行五七言古詩已而悔之謂詩當以編年爲次不當分體今所編詩十二卷其半猶出祖修手定也祖修詩頗雅馴嘗作讀王子淵傳詩有非無聖主賢臣頌只教宮人記洞簫之句後見升菴集中有之喜其閤合因作詩志之然此二語太涉論宗本非上乘且慎詩亦卽李商隱賈生詩可憐夜半虛

前席不問蒼生問鬼神之意亦非新義也

畏壘山人詩集四卷

浙江巡撫  
採進本

國朝徐昂發撰昂發有畏壘筆記已著錄是集諸體  
雜編其五言古體大抵刻峭清新一往駿利有透  
空碎遠之音而下手太快亦頗乏淳蓄深厚則思  
銳而才狹之故也

澄懷園全集三十七卷

通政司使張  
若淳刊本

國朝張廷玉撰廷玉字衡臣號硯齋桐城人康熙庚  
辰進士官至保和殿大學士諡文和是集爲廷玉

所自編凡文存十五卷皆乾隆戊辰以前作詩選  
十二卷皆雍正乙卯以前作載賡集六卷皆乾隆  
丙辰以後作澄懷園語四卷則所作筆記也

秋江詩集六卷

福建巡撫  
採進本

國朝黃任撰任字莘田永福人康熙壬午舉人官至  
四會縣知縣杭世駿榕城詩話稱其工書法好賓  
客詠諧談笑一座盡傾罷官歸里歷裝惟端溪石  
數枚詩束兩牛腰而已其詩源出溫李往往刻露  
清新別深懷抱如楊花絕句云到底不知離別苦

後身還去作浮萍春日襟思云夕陽大是無情物  
又送墻東一日春所爲緣情綺靡殆於近之而低  
徊宛轉亦或闌入小詞大致古體不如今體大篇  
又不如小詩故榕城詩話獨稱其七絕蓋才分各  
有所長云

秋葉軒詩四卷

江蘇巡撫  
採進本

國朝張琳撰琳字佩嘉一字玉田錢塘人是集乃康  
熙丙戌其友趙炎所選定集中近體多於古體而  
七言律詩一種又多於諸體大抵圓熟流利篇篇

如一盞其瓣香惟在劍南一集耳

黑蝶齋詩鈔四卷

浙江巡撫  
採進本

國朝沈岸登撰岸登字覃九號倚耕邨叟平湖人是  
集乃康熙壬午岸登歿後其從子黼熊所編共詩  
四百四十餘首其詩瘦削無俗韻而邊幅微狹亦  
緣於是

樓邨集二十五卷

安徽巡撫  
採進本

國朝王式丹撰式丹字方若寶應人康熙癸未進士  
第一官翰林院修撰是集乃雍正甲辰其子懋訥

所刻分年編次凡龍竿集五卷畢蘇集七卷補過齋集二卷忍冬齋集七卷鴻柯集一卷梅花書屋集三卷起壬申迄丙申每年一卷惟龍竿集之第五卷爲其壬申以前詩不以冠集而以殿集以少作故也

古劍書屋文鈔十卷

江蘇巡撫採進本

國朝吳廷楨撰廷楨字山掄長洲人康熙癸未進士官至左春坊左諭德是編凡詩八卷末附補遺及詩餘又禠文二卷乾隆丙子其孫士端刊於貴州

其名曰古劍書屋者

聖祖南巡廷楨以舉人

召試

御書古劍篇以賜因以爲名誌榮遇也

緯蕭草堂詩鈔六卷

浙江巡撫  
採進本

國朝宋至撰至字山言商邱人吏部尙書犖之子康

熙癸未進士官翰林院編修初刻有緯蕭堂詩一

卷附犖集後此其全集也至承其家學兼得新城

王士禎之傳故其詩派亦介出於父師之間但才

與學均未及耳集中孔雀聯句父子同爲之蓋用  
蘇軾與子過聯句例也

續學堂文鈔六卷詩鈔四卷

兩江總督  
採進本

國朝梅文鼎撰文鼎有歷算全書已著錄其以續學  
名堂者初大學士李光地嘗薦文鼎於朝康熙己  
酉恭逢

聖祖仁皇帝南巡文鼎迎

鑾道左蒙

召對

御書續學參微四字賜之因以名堂併以名集也然文鼎  
測驗推算諸法皆足以自傳於後詩文特其餘事  
非所擅長蓋算術雖一藝而非以畢生之精力專  
思研究則莫造其微雖超特絕世之姿其勢不能  
以旁及張衡深通厯算妙契陰陽至能作候風地  
動儀而文章博麗又能凌轢崔蔡之間千古一人  
而已自洛下閎鮮于妄人以下淳風一行亦未能  
以詞采著也斯亦物不兩大之理矣

滋蘭堂詩集十卷

浙江巡撫  
採進本

國朝沈元滄撰元滄有禮記類編已著錄是編分六  
集曰康瓠集灌畦集今雨集紫貝集勞薪集西征  
集前有其孫廷芳題識稱康瓠集爲家居侍親及  
爲查氏贅壻時作灌畦集爲移居龍山時作今雨  
集爲入直

武英殿時作紫貝集爲官文昌時作勞薪集爲罷官  
後自京赴粵時作西征集爲由粵赴京謫居銀州  
時作元滄爲查昇之壻久與查慎行遊故其詩格  
頗近初白堂集云

澹初詩稿八卷附見山堂詩鈔一卷

編修程晉芳家藏本

國朝沈翼機撰翼機字西園號澹初海寧人康熙丙戌進士官至翰林院侍讀學士詩分十集曰謀野集曰新安集附黃山紀遊百詠皆翼機爲諸生時作曰瀛洲集丹葵集皆館選後作曰蜀使草康熙甲午典試四川時作曰黔使草康熙丁酉至庚子爲貴州學政時作曰江右使草雍正癸卯至丙午爲江右學政時作曰兩山集乞假歸田後作曰觀光集乾隆元年翼機復補原官時作曰游衍集則

致仕後作也附見山堂詩鈔一卷爲其子廷薦之作廷薦字澄懷雍正壬子舉人未仕早卒僅存詩六十餘首

集虛齋學古文十二卷

浙江巡撫採進本

國朝方粲如撰粲如有離騷經解已著錄其制義最有時名而散體之文亦頗輿勁有筆力然喜雕琢新句襍積古辭遂流爲別派蓋其制義亦喜以新穎爲工天性然也

視齋詩選二卷

山東巡撫採進本

國朝張謙宜撰謙宜號稚松膠州人康熙丙戌進士  
是集末有法輝祖跋謂全稿三千餘首暮年自訂  
存詩四百餘篇自序凡千言極述其苦吟之狀然  
其詩出入於香山劍南之間一吟一咏亦足自娛  
起而抗衡古人則力尙不逮也

蓼村集四卷

編修周永年家藏本

國朝王萃撰萃字秋史厯城人康熙丙戌進士其詩  
爲王士禎田雯所稱而文不甚顯乾隆癸巳桂林  
胡德琳得其本於厯城周氏爲刪訂付梓德琳爲

之序稱原本分甲乙二集自癸亥至庚子三十四  
年之作各自編年惟辛丑以後之文無存今仍其  
舊編爲四卷乙居四之一惟書記記傳注干支於  
本目之下使後人有所考焉

雪鴻堂文集二卷

山東巡撫  
採進本

國朝李鍾我撰鍾我號芝麓通江人康熙丙戌進士  
官翰林院檢討是集乃其督學福建時所編凡賦  
頌一卷詩一卷多館課及應酬之作案鍾我父蕃  
有雪鴻堂集其兄鍾璧集襲用其名鍾我又襲用

其名殊不可解如以爲家乘之總名則又各爲卷  
第例亦難通也

王石和文集

無卷數 山西  
巡撫採進本

國朝王瑋撰瑋字石和又字韞輝孟縣人康熙丙戌  
進士官翰林院檢討是集多議論之文筆意亦  
頗縱橫其記周遇吉死節事謂賊兵攻城急城將  
陷賊募獻遇吉者遇吉謂左右曰豈惜一死以累  
衆可獻我兵民環泣衆遂以繩繫公下有兩賊掖  
之去公見賊罵倒懸演武廳磔之云云與明史本

傳不合又以野舫廟爲田子方廟與朱彛尊碑不合其最異者如文昌閣碑記謂孔子不得帝君之教天下將有悖心反道肆然於日用倫常之際而不復以天地日月爲可忌者尤不可爲訓也

十峰集五卷

江蘇周厚堦家藏本

國朝徐基撰基字宗頊華亭人由貢生官訓導是集自詩賦文及填詞皆集前後赤壁賦中字錯綜盡變極有巧思若其中遊小赤壁賦春日遊小赤壁賦及道德篇諸作皆洋洋數千言而伸之縮之不

出四百餘字之外雖才人狡獪不足以語大雅而  
專門之技別開奧窔亦詞苑中之奇作亘古所未  
有者也末卷倣梁簡文蘇蕙蘭古輦鑑圖及宋庠  
寄范仲淹諸迴文皆有思致卷首有康熙丙戌陳  
元龍序序集聖教序中字亦如自己出以弁此集  
可云勁敵然元龍特偶一爲之尙無不可基則弊  
一生之精神成此一集可謂宋人之楮葉矣

蓬莊詩集六卷

江西巡撫  
採進本

國朝沈虹撰虹字渭梁長洲人是集其所自編以作

詩先後爲次起康熙丁亥迄雍正甲辰古今體共  
五百四首每卷之前皆有小引紀其歲月及所閱  
厯遭逢

雄雉齋選集六卷

江蘇周厚  
堉家藏本

國朝顧圖河撰圖河字書宜江都人康熙己丑進士  
官翰林院編修其詩古體多學眉山近體多學劍  
南詠物諸作亦頗新穎而在同時諸人之中尙未  
能籠罩一切也

青溪詩偶存十卷

江蘇巡撫  
採進本

國朝蔣錫震撰錫震字豈潛宜興人康熙己丑進士  
是集分二十二種曰輟耕草北征集渡河集贅疣  
集北遊草楚遊草還山草汗漫吟北行草歸耕草  
章江草還山草後北遊草涉江草洛游草灌園草  
遊燕草廬中吟後章江草還山吟金臺草學製集  
自己己至壬寅凡三十四年之作皆以年編次

退谷文集十五卷詩集七卷

兩江總督  
採進本

國朝黃越撰越字際飛上元人康熙己丑進士改庶  
吉士所著四書大全合訂及選刻制義如明文商

今文商墨卷商考卷商之類皆盛行一時蓋平生精力注於講章時文此集所著詩古文乃以餘暇兼治者其尙書古今文辨惟以蔡傳折服諸家三傳得失辨惟以胡傳斷制衆論亦仍舉業繩尺也

圭美堂集二十六卷

浙江巡撫  
採進本

國朝徐用錫撰用錫字畫堂宿遷人康熙己丑進士官翰林院編修是集詩十卷文十六卷乃其族子鐸及門人周毓崙所校刊用錫從學於李光地作文以樸澹爲長平生書法頗工集中字學劄記二

卷皆自道其心得其他題跋亦辨論法帖手蹟者居多

青要集十二卷

浙江巡撫採進本

國朝呂謙恒撰謙恒字天益河南新安人康熙己丑進士官至光祿寺卿謙恒嘗讀書青要山因以名集其詩純作宋格疎爽有餘而亦頗傷樸直如洗象行之類皆病於太質

吾廬遺書

無卷數 江西巡撫採進本

國朝陶成撰成有皇極數鈔已著錄是集爲其子其

愍所編皆所作襍文頗純正有軌度而稍狹於波  
瀾其象緯考一篇有錄無書意傳寫佚之或於訂  
定時刪去而誤留其目也

性影集八卷

江蘇巡撫  
採進本

國朝王時憲撰時憲字若干號禊亭太倉人康熙已  
丑進士由宜興教諭改翰林院庶吉士是編凡八  
集集各一卷曰水邊林下稿曰桐溪稿曰無隱林  
稿曰靜寄軒稿曰莊澠稿曰荆溪稿曰楚遊稿曰  
粵遊稿其名性影者蓋取邵子情爲性影之說也

集中近體頗饒風致擬古諸作則隨意抒寫不甚

求工

改堂文鈔二卷

江蘇巡撫  
採進本

國朝唐紹祖撰紹祖字次衣江都人康熙己丑進士  
由庶吉士改刑部主事官至湖州府知府仍入爲  
刑部員外郎告歸卒紹祖少師姜宸英登第出安  
溪李光地之門故其文蒼勁有師法此集乃晚年  
手自刪定僅存四十三篇皆其生平得意之作也

石川詩鈔三卷

浙江巡撫  
採進本

國朝方觀撰觀字近雯江都人康熙己丑進士官至陝西布政使是集乃其少子柱山所編凡各體詩二百六十餘首其題朱彝尊手書詩冊有曝書亭下自抄詩想見蒼茫獨立時不是到門親受業唐音宋格有誰知蓋嘗從學於彝尊者也

師經堂集十八卷

浙江巡撫採進本

國朝徐文駒撰文駒字子文鄞縣人康熙己丑進士是集爲文駒所自編凡文十三卷詩五卷前有孫勳序稱其濬伊洛之淵源探韓歐之骨髓沈浸醲

郁積有年歲自序亦主於自達其情今觀其集滔滔而出足以暢所欲言然未能固而存之也

墨澗亭集

無卷數 江西巡撫採進本

國朝帥我撰我字備皆號簡齋奉新人康熙辛卯舉人江西古文自艾南英倡於前魏禧等和於後踵而起者雖所造深淺不同而大都循循有舊法是集亦其一也舊刊板於南昌所載未備雍正乙卯其子念祖屬徐廷槐取已刻未刻諸稿裒爲此本凡一百四十篇

殘本雲川閣詩集九卷

兩江總督採進本

國朝杜詔撰詔字紫綸無錫人康熙乙酉

聖祖仁皇帝南巡迎

鑾獻詩

命供奉

內廷壬辰會試榜後

特賜一體殿試改庶吉士是編總題雲川閣集而僅有古

體詩詩又起於卷三終於第十二前無目錄其板

又近時新刻不喻其故或裝輯者佚之耶

閻邱詩集六十卷

兩淮馬俗家藏本

國朝顧嗣立撰嗣立有溫飛卿詩註已著錄江南通志文苑傳稱嗣立博學有才名尤工詩所居秀野草堂常集四方知名士觴詠無虛日風流文雅照映一時曾撰元詩選四集採摭略備蓋其性之所近故詩亦往往似之

今有堂詩集六卷附茗柯詞一卷

編修程晉芳家藏本

國朝程夢星撰夢星字午橋號香溪江都人康熙壬辰進士官翰林院編修家有篠園擅水竹之勝日

與賓客吟詠其中年七十七乃卒是編分六集曰  
濟南集蝨餘集五貺集山心集琴語集就簡集末  
附茗柯詞其詩畧近劍南一派而間出入於玉溪  
生詞亦具南宋之體但格力差減耳

二水樓詩集十八卷文集十卷

江西巡撫  
採進本

國朝李茹旻撰茹旻字覆如臨川人康熙癸巳進士  
官中書舍人嘗預修廣西通志撫州府志所作凡  
例及諸傳序皆載集中

朱圉山人集十二卷

陝西巡撫  
採進本

國朝輩建豐撰建豐字子文號渭川又號介亭伏羌人康熙癸巳進士官至翰林院侍讀學士是集詩文各六卷又以補遺之文附於詩末大抵平實簡易無擅勝之處亦無踳駁之處

三華集四卷

兵部侍郎紀昀家藏本

國朝梁機撰機字仙來泰和人康熙癸巳進士是集機所自編分四子部一曰入洛志勝多題詠古蹟之作一曰燕雲詩鈔隨侍其父宦遊京邸之作皆王士禎選定一曰徵草則乾隆元年薦舉博學鴻

詞

召試入都之作一曰還草則試不入格歸途之作也

練溪集五卷

山東巡撫  
採進本

國朝傅米石撰米石字立元鉅野人康熙癸巳舉人  
是集凡文二卷詩二卷雜記一卷前有其門人李  
包序後有其子爾德所作家傳其古文頗謹嚴有  
法度如琢磨偶記序誤以碧雲馭爲白獺隨引據  
或疎管蔡論謂周公勝季友殊爲贅衍季札論責  
以當爲伯夷泰伯之逃亦爲吹索然其他率不失

醇正雜說持論亦平允其曰讀書之人屏伏田里  
不敢爲畸邪之行不敢爲詭激之論不敢著非聖  
之書謹身力行以爲齊民先是卽所以報君父可  
謂有德之言其誤以鈎轉爲蟬之類特小失耳惟  
古詩以文筆爲之猶未乖大雅近體則皆不入格  
甚至以海若押入馬韻是蘭若之若也以刻鏤讀  
爲平聲是屬鏤之鏤也吟咏非所擅長而襍然編  
錄轉爲全集之累是則其後人之過矣

約園詩鈔一卷

福建巡撫  
採進本

國朝郭雍撰雍字仲穆一字書禪福清人約園其號也康熙癸巳舉人是集各體詩共二百餘首雍自謂前後所作多屬近體於古體歌行間存一二樂府則有待而未及今觀其詩惟五言律詩頗有局度餘皆平平詩不沿溯於古而先求之偶儷之格終不能探其本也

瓦缶集十二卷

浙江巡撫採進本

國朝李宗渭撰宗渭字秦川嘉興人康熙癸巳舉人初於康熙丁亥自編其詩爲瓦缶集三卷後又有

永懷集一卷附刻以行宗渭歿後其壻高衡乃哀其遺詩編爲樂府一卷古體九卷近體二卷仍以瓦缶爲名從其初稱也其詩古體多於近體五言多於七言大旨以漢魏六朝唐人爲法而不肯爲宋元之格故字句率有古意昔人論林鴻之詩如唐摹晉帖者其庶幾乎

若菴集五卷

兩江總督採進本

國朝程庭撰庭字且碩號若菴歙縣人是集文一卷次詩一卷次詩餘一卷次停驂隨筆一卷康熙癸

已庭至京祝

釐隨日紀行所作附以詩詞次春帆紀程一卷則自揚州

至歙往返所作亦有詩詞附焉

嗜退山房稿五卷

江西巡撫  
採進本

國朝帥仍祖撰仍祖字宗道號介亭山人奉新人是集乃仍祖自編其康熙癸巳甲午二年所作凡詩

二卷文三卷

空明子詩集十卷又八卷文集六卷又二卷雜錄一卷

詩餘一卷

江蘇巡撫  
採進本

國朝張榮撰榮字景恒華亭人自序謂生平共得古文雜作六百餘首詩三萬餘首詩餘一千五百餘首歌謠三百餘首康熙甲午檢出盡附祖龍僅存三十分之一卽是編也詞意多放曠不羈

挹青軒詩稿一卷

江蘇巡撫採進本

國朝華浣芳撰浣芳蘇州女子華亭張榮之妾也年二十三而卒榮刊其遺詩自爲作序述其九歲時夢見唐太宗召有唐一代諸詩人教之作詩其事甚怪榮好爲遊戲之文殆亦寓言耶

龍溪草堂集十卷

山東巡撫採進本

國朝王世禕撰世禕字道存章邱人康熙乙未進士官上海縣知縣世禕初改庶吉士及散館乃外補故是集多館課之作至第九卷金陵宦稿中八戒詩意求通俗然太質勝於文矣

陳玉几詩集三卷

禮部主事任大椿家藏本

國朝陳撰撰字楞山號玉几鄞縣人以書畫遊江淮間窮愁寡合故其詩多悽斷怨咽之音是編刻於康熙丙申蓋其中年所作首曰繡鉢集一卷次

曰玉几山房吟一卷次曰玉几山房擬古詩一卷  
皆戛戛獨造如其爲人雖未及古要能離俗惟擬  
古詩中多載勝流評語仍沿明末山人之習耳

雲溪文集五卷

兩江總督  
採進本

國朝儲掌文撰掌文字曰虞一字越漁宜興人康熙  
丁酉舉人官四川納溪縣知縣納溪舊名雲溪故  
掌文以雲溪自號是集又名雲溪隨筆自儲欣以  
古文詞有名其家父子兄弟多以此相鏃礪掌文  
爲欣之孫得其指授爲多今世所傳欣選左國史

漢及唐宋十家文卽其甄錄以授掌文者也

據梧詩集十五卷

兩淮馬裕家藏本

國朝管楡撰楡有師宗州志已著錄是編凡吹萬集  
二卷柏軒草二卷修琴閣集二卷鷗馴集二卷天  
外集二卷圃華集二卷寓檠稿三卷邵長蘅序稱  
其詩先學劍南後學少陵今觀所作大抵先入者  
爲主也

近道齋文集六卷詩集四卷

吏部主事張慎和家藏本

國朝陳萬策撰萬策字對初一字謙季安溪人徙於

晉江康熙戊戌進士官至詹事府詹事緣事降翰  
林院檢討終於侍讀學士萬策以康熙癸酉舉於  
鄉困公車者二十六年久從李光地遊多得其指  
授然平生詩文多散佚不收此本乃乾隆癸亥其  
子冕世所輯其中西算法異同論頗能究其所以  
然李光地施琅諸傳軼聞舊事亦多可考云

白田草堂存稿二十卷

兩江總督  
採進本

國朝王懋竑撰懋竑有白田襍著已著錄是集凡文  
二十卷詩四卷末附行狀一篇其學長於考證故

全集以裸著爲冠詩文則未能過人其與方苞書  
自謂筆力拖沓不近古人所謂人之知我不如我  
之自知亦足見其學問之篤實也

莊元仲集一卷

福建巡撫  
採進本

國朝莊亨陽撰亨陽有算學已著錄此集僅文十二  
篇乃其官淮徐道時所上河防條議也

綠蘿山房文集二十四卷詩集三十三卷

江蘇巡撫  
採進本

國朝胡浚撰浚字希張號竹巖會稽人康熙庚子舉  
人是編文皆駢體浚自爲之注前有魯曾煜序稱

仿韓非子有經有傳例然韓非子經傳各自爲條  
其著書句下自註者始班固漢書藝文志作文句  
下自註者始謝靈運山居賦浚蓋用靈運例也

寒香閣詩集四卷

山東巡撫  
採進本

國朝鄧鍾岳撰鍾岳有知非錄已著錄是集爲乾隆  
乙亥其子汝功汝敏所編凡古今體詩一百九十  
二首其詩頗溫厚和平無血脈憤張之狀而材地  
稍弱尚未能頡頏古人

墨麟詩十二卷

浙江巡撫  
採進本

國朝馬維翰撰維翰字墨麟海鹽人康熙辛丑進士官至四川東道其詩以縱橫排奐爲長意之所向不避險阻然神鋒太儁者居多

秋塋文鈔十二卷二州詩鈔四卷

浙江巡撫採進本

國朝魯曾煜撰曾煜字啟人秋塋其別號也會稽人康熙辛丑進士改庶吉士未授職乞養親歸教授生徒終於家是集文一百二十一篇中多考證之作其文氣頗剽急蓋才性使然若續中山狼傳之類雖規撫毛穎然不作可也目列易本末論六十

四篇易纂例八十篇而有錄無書蓋均未刻又廣東祥符二志凡例亦有錄無書殆以已見於兩志歟其詩以三州名集自序曰杭州汴州廣州也蓋其厯主講席游蹤所及之地云

最古園二編十八卷

江蘇周厚堦家藏本

國朝羅人琮撰人琮字紫蘿湖南桃源人康熙辛丑進士官至監察御史是集人琮所自定其云二編以尙有初刻最古園集二十四卷也然其初刻今未之見此集詩文則大抵以才氣用事曼衍縱橫

陸堂文集二十卷詩集十六卷續詩集八卷

浙江巡撫採進本

國朝陸奎勲撰奎勲有陸堂易學已著錄是集前有自序謂在長洲汪琬秀水朱彝尊之間其文內序問考辨諸篇亦頗博辨然說經好爲異論於近人頗近毛奇齡尙不及琬與彝尊也

唐堂集六十一卷

江蘇巡撫採進本

國朝黃之雋撰之雋有香屑集已著錄是集凡五十卷又補遺二卷續集八卷皆之雋所手編各有自序未附冬錄一卷則所自撰年譜也之雋之學排

陸王而尊程朱多散見所作諸文中持論甚正而  
綜覽浩博才華富贍興之所至下筆不能自休往  
往溢爲狡獪遊戲之文不免詞人之結習又名譽  
旣盛贈答遂繁牽牽應酬不能割愛榛櫟勿翦所  
存者不盡精華譬之古人殆陸機之患才多矣

雲在詩鈔九卷

浙江巡撫  
孫進本

國朝查祥撰祥字星南海寧人康熙辛丑進士官翰  
林院編修祥早歲嘗舉博學鴻詞晚乃登第年至  
八十餘而沒詩集未經刊行此流傳之寫本也

小蘭陔集十二卷

福建巡撫  
採進本

國朝謝道承撰道承字又紹號古梅閩縣人康熙辛丑進士官至內閣學士兼禮部侍郎是集詩十卷文二卷道承假歸養親故取南陔補亡詩語名集而集中所載則應制館課之作皆在焉不專家居作也其中碑帖題跋亦頗具鑒賞

桐村詩九卷

江西巡撫  
採進本

國朝馬詠撰詠字夔颺金谿人康熙辛丑進士官翰林院編修是編一卷爲一集一曰江漢集二曰日

下集三曰章江集四曰南海集五曰南海二集六  
曰公車集七曰玉堂集八曰京口集九曰黔中集  
分年編次各以作詩之地爲名始於康熙癸巳迄  
於雍正巳酉共十七年之詩前有自序題康熙甲  
午葢江漢集之序刊板時取冠全詩爾

崇德堂集八卷

直隸總督  
採進本

國朝王植撰植有四書參註已著錄此集植所自編  
其學主於敦勵名節而事事有濟於物故集中所  
載多居官案牘之文頗足見其生平其考論經籍

則好以意推理斷不能一一徵於古也

偶存草

無卷數直隸總督採進本

國朝王植撰是集亦植所自編植喜講學故其詩全

沿擊壤集之派

墻東禠著一卷

浙江巡撫採進本

國朝王汝驤撰汝驤字雲衢所刻制義或自書曰云

叻又自書曰耘渠皆以同音假借也金壇人由貢

生官通江縣知縣此編乃所作古文其以墻東爲

名蓋用後漢王君公事汝驤掉鞅文壇事殊牛僧

殆以其王姓斷章取義耶文凡二十一篇前六篇  
皆經說後十五篇則皆史評也其術序記謂學記  
術有序卽遂也辨舊志讀術爲州之非考春秋秦  
伯使術來聘公穀作使遂則汝驤之說實闇合古  
義其荀彧論上下二篇反覆推獎以爲有道之士  
則過矣

南園詩鈔十卷

江蘇巡撫  
採進本

國朝尤世求撰世求字念修長洲人官南充縣知縣  
是集分金臺草一卷冰壺草二卷湛華草一卷懷

新草二卷沁雪草二卷逢辰草一卷都厯草一卷  
世求爲侗之孫故詩格亦與西堂雜俎相近

與梅堂遺集十二卷

江蘇巡撫  
採進本

國朝佟世思撰世思字儼若正藍旗漢軍以蔭生官  
思恩縣知縣是集凡詩十卷詞一卷雜文一卷其  
弟世集裒而刻之未附耳書一卷皆記所聞見荒  
怪之事分人物神異四部餘話一卷則以公事至  
恩平而記其風土也

金閭齋集十二卷

江蘇巡撫  
採進本

國朝金敞撰敞字廓明號闇齋武進人其學出於東林是書首載家訓紀要次默齋湯先生述略次共學山居會約次自知日錄次讀史筆記次古今體詩次襍著次可凡編次客牕偶記次師古約言次宗約宗範其中家訓紀要一卷乃其父所劄記以訓子孫敞更纂而錄之故冠首云

前溪集十四卷

浙江巡撫採進本

國朝唐靖撰靖字聞宣武康人康熙中諸生是集詩八卷文五卷二集詩一卷其詩頗具風骨間傷率

易其文亦然五卷論水利樂律諸條則科舉答策之類耳前溪在武康縣治南源出銅峴山在六朝爲繁會地所謂前溪舞者是也

華林莊詩集四卷

江蘇巡撫孫進本

國朝姚孔鑄撰孔鑄字梁貢號于巢桐城人康熙中諸生其詩七言絕句工於寫景如垂楊枝上鶯捎蝶撼得飛花破水痕之類亦殊有晚唐風味所謂香車金犢陌上留連者也至黃雲白雪門前路蕎麥田中作菜花之類則刻畫太甚無情景交融之

致矣

瓠尊山人詩集十七卷

檢討蕭芝家藏本

國朝夏熙臣撰熙臣字無易孝感人七歲補諸生以歲貢官安陸府教授初著有巢雲閣詩十五卷後增以新作編爲此集其詩才情富贍故往往疊韻至五六又和阮籍詠懷擬李東陽樂府殆遍然連篇累幅瑕瑜不免互見亦所謂武庫之兵利鈍互陳者矣

道腴堂詩集四卷

江西巡撫採進本

國朝曹煜曾撰煜曾字麓蒿上海人康熙末貢生是集爲其孫錫寶所編石倉世纂之第一種也凡詩一百五十五首煜曾爲雲間董俞弟子故其詩聲律格調頗有師法然卷中但存近體而無古詩王延年序稱其懶不自惜散佚頗多今所傳者皆其孫口授豈訓課時惟取聲律諧適易於記誦故耶

長嘯軒詩集六卷

江西巡撫採進本

國朝曹煥曾撰煥曾字祖望號春浦上海人康熙末貢生炳曾之弟也是集爲石倉世纂之第二種凡

詩四卷後附詩餘一卷襍著一卷其生平所注意

者在於詩餘駢體其詩亦專學晚唐以纖麗自喜

放言居詩集六卷

江西巡撫  
採進本

國朝曹炳曾撰炳曾字爲章號巢南上海人康熙末

諸生煜曾之從弟也是集爲石倉世纂之第三種

凡詩五卷後附雜著一卷并從子一士所撰墓誌

銘其詩與煜曾道腴堂集格律相近而才地稍遜

焉

隨村遺集六卷

江西巡撫  
採進本

國朝施璟撰璟號隨村宣城人侍讀閨章之孫也此集爲杭世駿所編其詩酷學其祖而風骨稍峭邊幅少狹則根柢之深厚不及也

有懷堂詩文集一卷

江西巡撫採進本

國朝田肇麗撰肇麗字念始號蒼厓戶部侍郎雯之  
子官戶部郎中肇麗負雋才而屢試不第其入官  
也以任子故述懷詩有慚非科名人句蓋吟咏之  
間嘗以是耿耿云

靜便齋集十卷

浙江巡撫採進本

國朝王曾祥撰曾祥字馨徵仁和人康熙末諸生與厲鶚金農諸人相唱和是集前五卷爲詩後五卷皆雜文靜便齋者館於義橋陳氏時所葺取謝靈運還得靜者便句名之有所爲記見於集中前有雷鉞所撰兩王生小傳一謂曾祥一謂江都王世球也

鍾水堂詩三卷

山東巡撫採進本

國朝顏肇維撰肇維字次雷曲阜人官臨海縣知縣是集乃其官浙東時所作詩多學南宋諸家

帶月草堂詩集一卷

山東巡撫  
孫道本

國朝顏懷禮撰懷禮字約亭曲阜人襲世職爲五經  
博士好學喜爲詩早年天逝故骨格未成此集爲  
其弟懷繹所編前有康熙後壬寅嶧縣李克敬序  
亦稱天假以年俾盡其勤何遽不如鏤肝斲髓者  
之所爲也

青嶼稿存

無卷數  
浙江  
巡撫孫道本

國朝張安絃撰安絃字琴父烏程人其文以才氣勝  
而喜事塗澤詩則音節疎放亦未能磨礪圭角

桐乳齋詩集十二卷

浙江巡撫  
採進本

國朝梁文瀛撰文瀛字谿父錢塘人大學士詩正父  
也是集凡詩九百餘首而同時唱和諸作亦間附  
錄杭世駿序稱其壯時南浮衡湘北抵碣石踐歷  
嵩華迴旋宋衛之郊蓋頗耽懷山水者故記游之  
詩爲多焉

橡村集四卷

山東巡撫  
採進本

國朝朱紉撰紉字子青號橡村厯城人候補主事嘗  
學詩於王士禎故所作具有法程而早年天逝骨

格未成是集分四種曰風香集曰吳船書屋集曰  
觀稼樓詩曰雲根清壑集自吳船書屋以下皆士  
禎之所評定

蒼雪山房稿一卷

山東巡撫  
採進本

國朝朱綱撰綱字子聰歷城人官至福建巡撫與兄  
絳皆學詩於王士禎是集亦士禎所評定詩頗  
清淺蓋少作也

吾友于齋詩鈔八卷

浙江巡撫  
採進本

國朝張錫爵撰錫爵字擔伯號中巖嘉定人寄居吳

江是集前有雍正乙巳張雲章序題曰原序蓋爲其舊稿而作又有乾隆辛酉朱稻孫序則刊此本

時所作其詩酷摹王士禎亦往往得其一體其齋

名吾友于者取杜甫岳麓寺詩山花山鳥吾友于

語也





按卷一百八十六、一百八十七爲總集類，將之析出，印入第五冊。

欽定四庫全書總目

集部

卷一百八十六

七十五

欽定四庫全書總目卷一百八十五

集部三十八

別集類存目十二

庶尾詩集十五卷文集二卷

福建巡撫  
孫道本

國朝鄭方坤撰方坤有經裨已著錄方坤天分既高

記誦尤廣故其詩下筆不休有凌厲一切之意尤

力攻嚴羽滄浪詩話詩不闢學之非然於澁字險

韻恒數十疊雖間見層出波瀾不窮要亦不免於

炫博此文以學富失之所謂矯枉者必過直也其

詩凡分十五集曰刪餘草曰公車草曰木石居草  
曰公車後草曰木石居後草曰丁年小草曰叢臺  
稿曰春明草曰廣川稿曰酒市稿曰一粟齋稿曰  
瓶花齋稿曰杞菊軒稿曰詩話軒稿皆古今體詩  
曰青衫詞則詩餘附錄者也文集二卷亦大抵儷  
體居多蓋其根柢在六朝也

樹人堂詩七卷

江西巡撫  
採進本

國朝帥念祖撰念祖字宗德號蘭臯奉新人雍正癸  
卯進士官至陝西布政使緣事謫戍軍臺歿於塞

外是集前有吳焯序稱念祖塞上所作有多博吟  
今未見此七卷則念祖官陝西時所自編也念祖  
以時文鳴一時務以幽渺之思擺脫陳腐其詩亦  
清刻不俗但平生精力盡於八比徒以餘力爲之  
未能自成一隊耳

涵有堂詩文集四卷

福建巡撫  
採進本

國朝游紹安撰紹安號心水福清人雍正癸卯進士  
官至南安府知府是集詩二卷文二卷其守南安  
幾二十年故多南安所作其文務爲奇崛語詩亦

欲以生僻見長

南陔堂詩集十二卷

編修徐天  
柱家藏本

國朝徐以升撰以升字階五號恕齋雍正癸卯進士  
官至廣東按察使是編爲其孫天柱天驥所刊分  
年編次曰學步集雪泥集湘灘集夢華集忽至草  
黃樓草岫岫草南還集黔游草烟江疊嶂集閒閒  
集凡十二種

已山文集十卷別集四卷

江蘇巡撫  
採進本

國朝王步青撰步青有四書本義滙叅已著錄金壇

王氏以能八比稱於世者凡六人所謂王氏六子是也六子之中汝驤及步青名尤著汝驤文神思澹遠取徑單微步青則法律謹嚴不失尺寸在近時號爲正宗於古文則餘力及之非所專門也其集原名竹里草堂遺稿乃步青歿後其子士鼇所編後寧化雷鉉督學江蘇時從士鼇取其稿本重爲刪定凡存九十餘篇勒爲十卷用步青別號改題今名又別集四卷皆其時文選本之序論則士鼇哀輯編次附刊以行蓋步青困諸生者二十餘

年至康熙甲午乃舉於鄉往來公車又十年至雍正癸卯始成進士旋以病乞歸里居教授惟以評選時文爲事平生精力盡在於是故講論時文之語至於積成卷帙考論文之書自摯虞文章流別後凡數百家其專論場屋程試者則自元倪士毅作義要訣始自爲一編於例當入詩文評類以其原附本集之末故仍其舊焉

江聲草堂詩集八卷

浙江巡撫  
採進本

國朝金志章撰志章字繪甫仁和人雍正癸卯舉人

官至口北道是編分七集曰敝帚曰梅東曰始遊  
曰鏡中曰瞻雲曰谷雲曰漁浦歸耕其詩五言古  
體多學蘇軾七言古體多學溫庭筠近體多學陸  
游范成大

謙齋詩稿二卷補遺一卷

浙江巡撫  
採進本

國朝曹庭樞撰庭樞字大薌嘉善人雍正癸卯副榜  
貢生乾隆元年嘗薦舉博學鴻詞集中載有

午門謝頒月廩恭紀詩卽其事也是集亦皆其游京  
師時所作

司業文集四卷

江蘇巡撫  
採進本

國朝陳祖范撰祖范有經咫已著錄其爲文不規規  
於摹古而學有根柢暢所欲言亦自合古人法度  
其中如方孝孺死節論讀禮記述史述斂用喪服  
議陳貞女合葬議王罕皆文稿序汪西京文稿序  
王次山詩序樂府解皆有可觀而如記昌黎集後  
務爲新論別號舍文忽作俳體松筠堂宴集詩序  
雜以儷詞又多收一切應俗之作蓋編錄時務盈  
卷帙一槩登載未免失於刊除使簡汰精華十存

三四豈不翹然作者哉

司業詩集四卷

江蘇巡撫  
採進本

國朝陳祖范撰前有自序題乾隆壬申而第四卷乃  
題自乙丑至甲戌詩蓋又有所續入如古人後集  
別集例也其詩直抒胸臆不煩繩削於古人中去  
白居易爲近敖陶孫所謂事事言言皆著實者也  
自序有曰詩之作出於無心則其情真又必各有  
所爲則其義實故一國之事係一人之本而匹夫  
匹婦之歌吟可以察治忽也其論洞悉本源非明

以來彫章刻句之流所能見及又云後之詩人既以詩自命人亦以詩相屬於是外物爲主而詩役焉詩爲主而心役焉於是無真性情真比興然而情實彌隱詞采彌工義理彌消波瀾彌富而又格律以繩之派別以嚴之時代以區分之回視詩教之本來其然乎其不然乎其論亦切中流弊劉勰所謂古之詩人爲情而造文今之詩人爲文而造情者祖范所言殆庶幾焉然文以載道理不可移而宋儒諸語錄言言誠敬字字性天卒不能與韓

柳歐蘇爭文壇尺寸之地則文質相宣亦必有道矣觀祖范之序而其詩所長所短蓋可以想見也

王良齋集十四卷

江蘇巡撫採進本

國朝王峻撰峻字次山常熟人雍正甲辰進士官至江西道御史是編凡詩十卷文四卷其吳中先哲諸傳則修蘇州府志時所撰亦併附之集中云

鋤經餘草十六卷

侍講劉亨地家藏本

國朝王文清撰文清有周禮會要已著錄此其所作詩集前有論詩法十條則其平生心得之詩而其

門人錄以冠集者也

明史雜詠四卷

浙江巡撫  
採進本

國朝嚴遂成撰遂成字海珊烏程人雍正甲辰進士  
官雲南知州詠史之作起於班固承其流者唐胡  
曾周曇皆用近體明李東陽則用樂府體遂成此  
編賦明一代之事古體近體相間故名曰雜詠嚴  
震直一首力辨史彬致身錄之誣雖子孫之詞實  
則公論至于劉三吾一首謂太祖欲立燕王爲三  
吾所沮釀靖難之禍不爲無見至周公成王本一

家事猶賢於王莽纂句則謬矣姚廣孝二首盛推其功比以蕭何李泌且有特地開科長取士不知漏落幾多人句王越王驥王瓊三首謂三人之交結宦侍乃借其陰助以濟國事非爲身家之計比之郭子儀之俯仰魚朝恩持論皆有意抑揚故翻定案李夢陽一首詞多詆斥併有附記曰北地雖非西涯門人然如王九思以仿西涯體中選其餘諸子多有親承指授者皆奪於北地之焰改轅背之猶之北地背之也云云夫文章公器各自成家

原非爲植黨報恩之地況夢陽與東陽本風馬牛  
不相及而忽坐以背東陽之罪尤未免深文鍛鍊  
踵明末門戶之舊論矣

絳附閣詩藁十一卷

浙江巡撫  
採進本

國朝諸錦撰錦有毛詩說已著錄是編古今體詩分  
三十一集自康熙甲申至乾隆壬午五十九年之  
作共一千五百餘篇

賜書堂詩選八卷

編修吳壽  
昌家藏本

國朝周長發撰長發字蘭坡別號石帆會稽籍山陰

人雍正甲辰進士選庶吉士散館外補廣昌縣知縣又改樂清縣教諭乾隆丙辰

召試博學鴻詞授檢討官至侍講學士後降補侍講長發詩才敏捷操筆卽成故富贍有餘而亦微傷於快平生所作計逾萬首此集八卷蓋汰存十之一云

小山全稿二十卷

江蘇周厚堉家藏本

國朝王時翔撰時翔字臯謨一字抱翼號小山鎮洋人雍正戊申由諸生薦舉授晉江縣知縣官至成

都府知府是集凡詩稿八卷詩餘四卷文稿八卷  
詩稿分初續後三稿詩餘分五集曰香濤曰紺寒  
曰青綃樂府曰初禪綺詩曰旗亭夢鑒

就正草一卷

江西巡撫  
採進本

國朝徐璽撰璽號雷谿進賢人雍正己酉拔貢是編  
乃其文集前題云續刻就正草則必先有初刻今  
未之見前有吳士玉序而卷中有祭士玉文殆刻  
在序後耶

松源集

無卷數 兩江  
總督採進本

國朝孫之騷撰之騷所輯尙書大傳已著錄是集凡  
五種其題曰松源紀行者初取道富春赴慶元任  
作也曰龍泉舟中雜記者歲試至處州作也曰經  
說者告諸生五經源流記也曰敦行錄者與諸生  
立條約及經傳雜訓也曰雜文者其酬應之作也  
集刻於雍正己酉庚戌間慶元古松源地故以爲  
是集之總名焉

春及堂詩集四十三卷

太常寺卿倪承寬家藏本

國朝倪國璉撰國璉有康濟錄已著錄是集乃乾隆

壬辰其子承寬所刊凡竹立園集一卷南隱山房  
小草一卷橘山游草二卷文杏館集一卷浮湍集  
一卷楓花草一卷松鱗書屋唱和詩一卷庚子詩  
草一卷剡東游草一卷廬江游草二卷西江游草  
三卷南游草二卷湖南吟稿二卷燕雲集一卷竹  
窻集三卷滇行集八卷春闈詩一卷星沙奉使集  
二卷潞河吟一卷庚申南行集三卷嘉蔭書屋集  
三卷皆國璉嚴自刪汰惟存其得意之作故每卷  
多者不過四十餘首少者或十餘首云

四焉齋詩集六卷附梯仙閣餘課一卷拂珠樓偶鈔二

卷

江西巡撫  
採進本

國朝曹一士撰一士字諤庭號濟寰上海人雍正庚戌進士官至兵科給事中是編乃其詩集石倉世纂之第四種也附載梯仙閣餘課爲一士繼室陸氏鳳池作刻於康熙壬辰又拂珠樓偶鈔一士之女錫珪所作刻於雍正甲寅

四焉齋文集八卷

江西巡撫  
採進本

國朝曹一士撰石倉世纂之第五種也與其詩集同

刻於乾隆庚午其論文之旨謂古人之所以稱古者乃意義之古非詞句之古有明潛溪遵巖荆川震川其文調之近時者甚多不以此損其古意于麟元美字句之古幾於無一不肖而終與古遠觀其持論可以見其宗旨矣

寒香草堂集四卷

檢討蕭芝家藏本

國朝劉元燮撰元燮字孟調湘潭人雍正庚戌進士官至山西道御史緣事降廣西布政司經歷所著有釋學齋稿梅垞吟篇什頗多是編古今體詩僅

二百餘首乃其晚年所自訂也

金管集一卷

江蘇巡撫  
採進本

國朝顧成天撰成天有離騷解已著錄其所作詩凡二千餘首嘗以質於蔡嵩嵩爲摘其中有關世教者八十三首鈔爲此集題曰金管用梁元帝事也

花語山房詩文小鈔一卷附三重賦一卷燕京賦一卷

江蘇巡撫  
採進本

國朝顧成天撰是集乃雍正庚戌辛亥二年成天侍

直

內廷時所作花語山房卽

苑外直廬名也凡詩六十八首文二十三首以歲月  
先後雜編不分體裁又三重賦一卷成天爲諸生  
時恭逢

聖祖南巡所獻燕京賦一卷併自註則雍正癸卯成天赴  
京會試時作也

桑穀甫集八十四卷

浙江巡撫  
採進本

國朝桑調元撰調元有論語說已著錄是集詩十四  
卷續集二十卷五嶽詩二十卷文三十卷調元才

鋒蹕厲學問亦足以副之故詩文縱橫排奐擺落  
蹊徑毅然自爲一家而恃其才學不主故常豪而  
失之怒張博而失之曼衍者亦時有之所作鎮海  
樓詩至七言長律二百韻古人無是格也其所以  
長卽其所以短乎

柯椽集一卷

侍講劉亨  
地家藏本

國朝周宣猷撰宣猷字辰遠長沙人雍正癸丑進士  
官至浙江鹽運通判是集凡雜文五十七篇駢體  
及賦亦參錯其間前後亦無序跋似乎未定之稿

其後人錄之成帙也末附陳兆崙所作傳一篇載  
宣猷所著尙有史斷史記難字南北史禪眠雲集  
禾中雜韻卷施小草諸編集中又有風鈴餘韻自  
序一篇亦所作詩集今惟卷施小草及此集存餘  
皆未見

雪舫詩鈔八卷

侍講劉亨  
地家藏本

國朝周宣猷撰其詩自乾隆辛未迄丁丑分年編次  
前七卷名卷施小草後一卷則

南巡紀盛

皇太后萬壽詩各三十首

柳漁詩鈔十二卷

浙江巡撫  
採進本

國朝張湄撰湄字鷺洲錢塘人雍正癸丑進士官至  
給事中是編分于野鷄木駟景滇行癡床海槎帖  
懷皖遊鷁風罍耻十集湄與金孝章厲鶚等以詩  
相鏃厲故集中與諸人唱和爲多

秋水齋詩集十五卷

浙江巡撫  
採進本

國朝張映斗撰映斗字雪子烏程人雍正癸丑進士  
官翰林院編修是編凡十四集首曰或可存集次

江上集次釣磯集次雲林集次范湖集次日下集  
次水籤集次新館集次內舍集次新館後集次舊  
雨集次清祕集次瀛臺集次使星集皆其子守約  
守愚所編前有湯右曾序作於康熙乙未蓋其早  
年卽爲右曾所賞識也

寧遠堂詩集一卷

侍講劉亨  
地家藏本

國朝朱成點撰成點字司衡寧鄉人此集其所自編  
自序有云遷徙流離至庚子疾中閉門却軌始多  
作詩以自遣而集中又有己酉下第詩蓋老於諸

生者也

松桂讀書堂集八卷

江蘇周厚堉家藏本

國朝姚培謙撰培謙字平山華亭人喜刻巾箱小本亦好事之士所著有春帆集刻於康熙庚子自知集刻於雍正甲辰樂府及覽古詩刻於乾隆己未此本乃乾隆庚申裒合諸編刪爲一集培謙自爲之序其諸集序亦仍列之於卷端

舒曉齋存稿三卷

山東巡撫採進本

國朝黃溶撰溶字涪遠鄆城人雍正中貢生是集凡

詩二卷詞賦其一卷皆未合古人尺度蓋鄉曲無師之學也

桐隱書屋集二卷

山東巡撫採進本

國朝朱崇勲撰崇勲字彞存號怡園歷城人其詩沿新城末派清脫有餘而深厚不足

湖上草堂詩一卷

山東巡撫採進本

國朝朱崇道撰崇道字帶存崇勲弟也其詩如寒烟依樹澹餘雪傍山明樵聲通澗底人影上蘆花頗有思致然寥寥數篇不成卷帙

蠶桑樂府一卷

江西巡撫  
採進本

國朝沈炳震撰炳震有九經辨字瀆蒙已著錄此乃其增默齋詩集之一種自護種至賽神凡二十首皆七言長句蓋欲以當蠶畢報賽之曲也

無悔齋集十五卷

浙江巡撫  
採進本

國朝周京撰京字西穆一字少穆錢塘人雍正中諸生是集爲同里厲鶚所定分年編次附錄全祖望所撰墓誌銘及同人掃墓詩鶚序以高岑豪健比之今觀其詩源出劍南在一時詩社中酒旗茗椀

拈韻分題亦足傾倒流輩若方駕古人則又當別論矣

寶嬾齋詩集四卷

浙江巡撫  
孫進本

國朝張時泰撰時泰字平山號六可嘉興人官桐城縣知縣是集前有時泰自作十嬾先生傳頗以曠達閒適自許傳末系以詩曰嬾送窮愁嬾顧身嬾趨權貴嬾干人嬾尋枯句每經日嬾作報書恒幾句幽賞嬾殊辜景物遠遊嬾已絕風塵嬾眠嬾起情如醉十嬾先生嬾是真其詩格大抵似此也

亦廬詩集二十八卷

江西巡撫  
採進本

國朝湯斯祚撰斯祚字衍之號亦廬南豐人雍正中  
以歲貢生官江西新昌縣訓導是集以編年爲次  
其居家則有超邁書堂草茗柯山房草遊楚則爲  
匡山草沔陽草泊歸而復出則有茗柯山房後草  
崇真禪院草沅湘草充貢以後則有北征燕山南  
轅諸草爲學官以後則有宜豐草俸滿草回任草  
宜豐後草其詩筆力頗爽健惟功候未深耳

芝壇集二卷

山東巡撫  
採進本

國朝張鵬翼撰鵬翼有芝壇史案已著錄其詩文皆以講學爲宗體格多近於語錄

江湖閒吟八卷

福建巡撫採進本

國朝王道撰道字直夫漳浦人官金山縣知縣卷首有黃之雋序稱所著有鹿臯文集有京華稿今未見此集題曰江湖閒吟乃其罷官後寓居朱涇所作其板心則題曰鹿臯詩集蓋其集總名鹿臯以詩文分集而詩集之中此爲一種也據所自述初學李夢陽後乃變以王維陸游然先入者爲主矣

慎獨軒文集八卷

浙江巡撫  
採進本

國朝劉青霞撰青霞字嘯林襄城人雍正中諸生是集皆散體雜文前有王心敬所作小傳稱其酷愛司馬遷班固書未嘗釋手今集中有小傳二卷史論一卷蓋亦留心史學者也

屏守齋遺稿四卷

江西巡撫  
採進本

國朝姚世鈺撰世鈺字玉裁號蕙田歸安人平生學問以何焯爲宗故全祖望爲其墓銘曰蕙田之學私淑義門義門之徒莫之或先人亦有言墨守太

堅慧田不信禦侮兀然每逢異幟互有爭端焦辱  
敝舌各尊所聞紀其實也祖望誌又稱馬曰駱馬  
曰琯張四科收拾其遺文開雕又稱所著爲蓮花  
莊集八卷此本書名卷數皆與誌不合未有張四  
教跋稱勒爲詩文各二卷則又無所闕佚不知何  
故也

蘊亭詩稿二卷

江蘇巡撫  
採進本

國朝金縷撰縷字連城先世居廣東縷移居於江南  
遂爲吳縣人是集爲其子祖靜所編前有錢維城

序稱其詩派出自嶺南少年至京師秋日游靈佑  
寺有高雲不碍靜晴日自知寒爲新城王士禎所  
賞又附載舊評數條其一條云才不富却有氣如  
裴旻舞劍非行陣之才而亦能令吳道子長筆力  
思不苦却自深如帝釋天人不能參扣闢大迦葉  
語亦一一入真法藏語格欲正却亦別如蜀漢南  
唐稱名甚正論其立國固是偏隅亦頗得其似云

翰村詩稿六卷

編修周永年家藏本

國朝仲是保撰是保字羹梅號翰村常熟人是集前

五卷爲是保所自編皆題曰行卷第一卷曰辛集  
第二曰壬集第三曰癸集第四曰甲集第五曰後  
甲集按唐時進士以所業投贄當路謂之行卷見  
於摭言等書者頗詳是保終老山林而名所作爲  
行卷未喻其說又文集以甲乙標自始於文選諸  
賦其兩集分甲乙者爲李商隱樊南集一集以甲  
乙分卷者爲陸龜蒙笠澤叢書然皆以十干爲次  
是集獨以辛壬癸甲爲次亦莫明其故第八卷題  
曰遺集則乾隆癸亥是保族卒於博山其友趙念

所續編也是保初學詩於同里馮武武馮班從子也故其詩格律色澤皆馮氏法康熙辛丑復北至益都從趙執信受學故其詩運意鑱刻則純用趙氏法云

梧江雜詠一卷

編修汪如藻家藏本

國朝劉雲鋒撰雲鋒字秋冶南昌人是編取梧州風土古蹟作竹枝詞四十五首各附註於下亦頗詳悉然皆因仍地志之舊文無所考辨

在亭叢藁二十卷

江蘇巡撫採進本

國朝李果撰果字碩夫長洲人在亭其號也是集凡  
雜文十二卷後附詠歸亭詩鈔八卷果之論文謂  
弇州北地文古而患乎似義烏延陵文真而患乎  
淺欲救似與淺之病惟在讀書窮理故所作頗有  
矩矱而墨守太甚亦未能變化也

樸庭詩藁十卷

編修吳壽  
昌家藏本

國朝吳煥文撰煥文字璞存一字樸庭會稽籍山陰  
人雍正中國子監生屢舉不第生平游歷一寄諸  
吟咏前四卷其友人嚴遂成所選後六卷則晚年

所自訂也

孤石山房詩集六卷

浙江巡撫  
採進本

國朝沈心撰心字房仲仁和人雍正中諸生早從查  
慎行游其詩亦頗有查氏法

抗言在昔集一卷

江西巡撫  
採進本

國朝沈永壺撰永壺字心玉山陰人是編皆咏古七  
言絕句而多考證文史與他家咏古評論事迹得  
失者又別其學識頗爲拔俗而有意示高或流於  
誕如論帝魏帝蜀一條洞見宋人之癥結論蘇氏

父子之文自相矛盾一條足闕其口論續通鑑綱目諸條皆頗公允論岳飛女銀瓶一條極有根據羊祜周恭帝二條亦頗有推闡至於以司馬遷之先黃老後六經爲是以王充論衡欲藉諸子正經之誤爲識在董仲舒上以莊子荀子爲兩大儒以老子配論語莊子配易管子配書離騷配詩荀子配禮史記配春秋續爲沈氏六經謂管子地員篇班固地理志伯仲禹貢而周禮職方有愧色皆未免有意駭俗不爲定論其論劍俠傳之諄似矣不

知劍俠傳本無是書乃明人抄太平廣記二卷爲  
之其論亢倉子爲影撰似矣不知爲王士元所補  
士元作孟浩然集序自言其始末最明頗爲失考  
又如

國朝詩人自王士禎朱彝尊田雯梁佩蘭朱琬諸人  
無一不肆詆排

國朝文人自黃宗羲毛奇齡汪琬姜宸英王源方苞  
諸人無一不遭指摘甚或加以醜詆至謂其不堪  
供唾且謂此外寥寥自卽無譏其意欲於百餘年

中以第一人自命尤放誕矣

二須堂集二卷

戶部尚書王際華家藏本

國朝丁詠淇撰詠淇字瞻武號萊濱居士錢塘人是  
集爲詠淇所自編二須者取諸葛亮學須靜才須  
學語也上卷書十二首序十九首下卷記二首傳  
六首論二首辨一首說四首題跋五首書事二首  
家訓十八則其中知希子傳未聞其人意爲自寓  
之詞歟文雖不甚入古格而頗以扶持名教爲主  
集中別有仰編序蓋其筆記又有萊濱詩鈔字爲

其詩集今皆未見

雙樹軒詩鈔一卷

編修李中  
簡刊本

國朝僧湛性撰湛性一名湛汎字藥根又曰葯菴本  
丹徒徐氏子居揚州之祇園菴故其詩卷亦自署  
爲江都初自刻所作爲葯菴集歿後其板散佚此  
本乃乾隆壬辰所重刊也其詩宗法王士禎惟沿  
溯於士禎唐詩十選之中故結體修潔時有雋語  
如所謂春風拂禪衣流鶯啼樹杪二月青滿林百  
花開已早者亦頗近自然然骨力未堅興象頗淺

十首以外語意略同蓋聰明多而學問少故流連  
光景所就止於如斯耳

香域內外集十二卷

兩淮馬裕  
家藏本

國朝釋敏膺撰敏膺蘇州花山翠巖寺僧是集乃其  
弟子聖藥等所編外集詩文凡七卷內集五卷皆  
語錄偈語

敲空遺響十二卷

內府  
藏本

國朝僧如乾撰如乾字憨休四川人嘗主陝西興善  
燉煌等寺是集凡雜文八卷詩四卷

餐秀集二卷

浙江巡撫  
採進本

國朝黃千人撰千人字證孫餘姚人宗羲之孫百家  
之子也官泰安縣丞是集爲其同官覺羅普爾泰  
所刊前有普爾泰序又有顏懋价序引嚴羽王士  
禎之說皆警館閣之士以抒其憤懣价字介子曲  
阜人以貢生官肥鄉教諭老而不第故其詞如是

云

梯青集

無卷數  
蕭芝家藏本  
檢討

國朝項大德撰大德字立上漢陽人刲股療母不愈

以哀毀卒是集凡賦二十七首詞四十一首吐屬  
頗韶秀而得年僅二十有六功候未深故骨格未  
能成就焉

月湖贍稿一卷

江西巡撫  
採進本

國朝王櫟撰櫟有讀畫錄已著錄是集僅文二十四  
首又多小品蓋猶明季山人之遺風抄本題曰月  
河贍稿考集內所居丙舍地名皆作月湖櫟別有  
讀畫錄亦載張庚爲作月湖圖則卷首月河字抄  
本誤也

夢村集二卷

編修周永年家藏本

國朝朱緯撰緯字義俶歷城人由歲貢生官邱縣訓導是集有七十自壽詩又有次兒生日詩作於七十四歲時蓋其晚年所自編詩頗清淺而時有脫灑之致

後海書堂遺文二卷

江蘇巡撫採進本

國朝王孝詠撰孝詠有嶺西雜錄已著錄是集上卷爲襍文下卷皆金石題跋文頗質實而少覺其樸惟題跋則品題不苟可取者多

薇香集一卷燕香集二卷燕香二集二卷

內閣中書方維甸家藏本

國朝方觀承撰觀承字遐穀號問亭又號宜田桐城人由監生薦授中書舍人官至直隸總督諡恪敏觀承遭遇

聖朝備蒙

恩眷封疆宣力積有勤勞而性嗜詩篇政務之餘不廢吟咏舊所著有東園剩稿入塞詩懷南草豎步吟叩舷吟宜田彙稿看蠶詞松漠草共八種皆編入述本堂詩集中已別著錄是編三集則其爲直隸

總督時所作其子維甸編錄別行者也

晚晴樓詩草二卷

大理寺卿  
錫熊家藏本

國朝曹錫淑撰錫淑字采行上海人兵科給事中一士之女適同里舉人陸正笏一士有四焉齋詩集其妻陸鳳池亦有梯仙閣餘課錫淑承其家學具有軌範大致以性情深至爲主不規規於儷偶聲律之間云

藍戶部集二十六卷

江西巡撫  
採進本

國朝藍千秋撰千秋字長青宜黃人以薦授國子監

學正官至

盛京戶部員外郎是集刻於乾隆丙寅凡詩四卷文

二十二卷

豐川全集二十八卷

內府藏本

國朝王心敬撰心敬有豐川易說已著錄此集乃所作語錄及雜著大抵講學者居多乃康熙丙申湖廣總督額倫特所刊額倫特卽嘗以隱逸薦心敬者也

豐川續集三十四卷

陝西巡撫採進本

國朝王心敬撰據其子勅凡例稱心敬康熙丙申刻  
有正續集二十八卷是已有正續兩集矣又稱自  
丙申至乾隆戊午與當代大人君子相酬答及與  
門人子弟講說論辨者視前刻倍多今裒成三十  
四卷是此本又出續集後矣然其二十八卷之本  
實不分正集續集之目未喻何說故此本仍刊板  
之名以豐川續集著錄焉

綠筠軒詩四卷

編修周永年家藏本

國朝張元撰元字殿傳淄川人雍正丙午舉人官魚

臺縣教諭元爲崑崙山人篤慶從子故詩法本王士禎之論以神韻爲宗晚乃漸歸朴老而終未忘其故轍是集凡七百餘首其孫庭宋所刻也

質園詩集三十二卷

編修程晉芳家藏本

國朝商盤撰盤號蒼雨又號寶意會稽人雍正庚戌進士官翰林院編修以養親乞外補改授同知終於元江府知府盤與錢塘厲鶚名價相埒才情富贍生平篇什甚多此集乃刪汰之餘尙三千首云

竹香詩集四卷

大理寺卿陸錫熊家藏本

國朝席鑒撰鑒字景溪常熟人雍正己酉舉人官內閣中書鑒爲吳偉業外孫於詩法頗有端緒此集凡詩三百餘篇乃其友杭世駿所刪存也

水壑詩鈔六卷

編修周永年家藏本

國朝朱令昭撰令昭字次公厯城人少與淄川張元膠州高鳳翰等結柳莊詩社繪畫篆刻皆能留意其詩與鳳翰相伯仲而少遜其雄傑

鷺浦集六卷

編修周永年家藏本

國朝朱懷樸撰懷樸字素存厯城人其詩格近宋人

而時有風致

菱溪遺草一卷

編修程晉芳家藏本

國朝蔣麟昌撰麟昌字靜存陽湖人乾隆己未進士官翰林院編修年僅二十有二而歿遺詩數十篇其父原任倉場侍郎炳爲刻而傳之

松泉詩集六卷

編修程晉芳家藏本

國朝江昱撰昱有尙書私學已著錄其平生喜爲韻語與編修程夢星等相唱和游蹟多在衡湘間是集卽刻於湖南者也

閨房集一卷

編修程晉芳家藏本

國朝陳珮撰珮字懷玉天長人江都諸生江昱之妻是集僅詩四十首長短句十首附以傳誄及昱所作墓碣

白雲詩集七卷別集一卷

兩江總督採進本

國朝盧存心撰存心原名琨字玉嚴別字敬甫錢塘人恩貢生乾隆元年嘗薦舉博學鴻詞是集首以文廟從祀弟子贊八十首殿以詠梅七言律詩八十五首前有桑調元序稱爲總角交其才氣亦調

元之亞也

萬青樓詩文殘編一卷

國子監助教張  
幾年家藏本

國朝邵昂霄撰昂霄有萬青樓圖編已著錄所著詩  
文名萬青樓稿身後散佚是編爲其從子是枏所  
手錄僅存文數篇詩數首而已

隨園詩集十卷附錄一卷

御史戈源  
家藏本

國朝邊連寶撰連寶字趙珍今刊本作肇吟乃戲以  
同音書之如申涵光本字符孟而每書鳧盟非其  
本字也任邱人雍正乙卯拔貢生乾隆丙辰薦舉

博學鴻詞辛未又薦舉經學是集前有乾隆丁丑  
戈濤序而第四卷以下題曰病餘草者乃皆戊寅  
以後詩蓋續編而仍冠以原序也附錄一卷曰禪  
家公案頌則其晚耽禪悅讀指月錄所作云

隱拙齋集五十卷

浙江巡撫  
採進本

國朝沈廷芳撰廷芳有十三經注疏正字已著錄是  
集爲廷芳所自編凡詩賦三十二卷散體文十八  
卷其詩學出於查慎行古文之學出於方苞故所  
作雖無鉅麗之觀而皆有法度

東山草堂集六卷

江西巡撫  
採進本

國朝潘安禮撰安禮字立夫南城人乾隆丙辰

召試博學鴻詞官翰林院編修是編皆其官京師時所作律賦凡三十九首其門人爲註而刻之

黃靜山集十二卷

江蘇巡撫  
採進本

國朝黃永年撰永年字靜山江西廣昌人乾隆丙辰進士官至常州府知府是集前有雷鋹所作墓誌銘稱所著有希賢編春秋四傳異同辨崧甫文類南莊類稿白雲詩鈔靜子曰錄此本僅有南莊類

稿八卷白雲詩鈔二卷奉使集一卷靜子曰錄一卷而他集不見其春秋四傳異同辨今在南莊類稿第二卷中亦不別爲書未喻其故又一別本僅有南莊類稿奉使集靜子曰錄三種疑其隨刻隨印皆非完本云

山陰集一卷歸田遺草一卷

編修鄭際唐家藏本

國朝林其茂撰其茂字培根侯官人乾隆丙辰進士官山陰縣知縣此二集一爲官山陰時作一爲罷官後作皆其茂沒後其婦弟鄭天錦所編冠以魯

曾煜所作家傳又有沈廷芳序惜其遭疾早世未克竟其所長蓋其茂沒時年僅三十九云

史復齋文集四卷

陝西巡撫採進本

國朝史調撰調字勻五號復齋晚號雲臺山人華陰人乾隆丙辰進士官仙遊縣知縣是集一卷爲其人乾隆丙辰進士官仙遊縣知縣是集一卷爲其官仙遊時稟諭及荒政義倉等畧二卷爲序跋書論三卷爲橫渠書院規諭及諭子書而以仙遊所定求士三則冠焉四卷爲語錄及功過式併以崔紀所作誌銘附於其後

瑜齋詩草一卷

庶吉士盧遂家藏本

國朝郭趙璧撰趙璧字名瑾侯官人乾隆丙辰舉人是集乃趙璧歿後其子文煥所編後其子文海又搜求佚稿附益之凡古今體詩一百十一首蓋趙璧喜吟咏而不自收拾故散失之餘所存僅此云

卓山詩集十二卷

江西巡撫採進本

國朝帥家相撰家相字仙子奉新人乾隆丁巳進士官至潯州府知府是集又名三十乘書樓集中多改竄之處蓋猶其自訂之原本也

瓠息齋前集二十四卷

浙江巡撫  
採進本

國朝凌樹屏撰樹屏字保釐烏程人乾隆己未進士

官鳳縣知縣調咸陽後改補嘉興府教授是集賦

一卷詩二十三卷分十二集大抵才情奔放之作

問義軒詩鈔二卷贗草一卷

國子監助教張  
義年家藏本

國朝莊綸渭撰綸渭字對樵號葦塘武進人乾隆壬

戌進士官定海縣知縣是集爲綸渭所手定其子

世駿校刊贗草乃其在定海時所著雜文及案牘

已載入定海續志又別錄成帙附於詩集之後焉

詠史六言一卷

侍講劉亨  
地家藏本

國朝周宣武撰宣武字變軒長沙人乾隆壬戌進士  
是編雜採史事以六言絕句評論之或一首咏一  
事或一首連類兩三事不分門目亦不敘時代後  
先每首之末各附論一篇六言一體古今作者頗  
少詩家偶一爲之避其難也宣武獨衍至百首以  
外意欲間道出奇然終不能見長也

月坡詩集四卷

福建巡撫  
採進本

國朝郭植撰植有經史問已著錄是集分四編一曰

雪竹草堂集一曰北遊集一曰臺江草一曰溫陵  
草以集中編年考之迄於辛酉蓋其鄉試中式之  
後所刊也

玉芝堂集九卷

江蘇巡撫  
採進本

國朝邵齊燾撰齊燾字荀慈昭文人乾隆壬戌進士  
官翰林院編修是集凡詩三卷文六卷乃其晚年  
所自定詩文皆不分體大抵駢偶之作爲多爲四  
六之文者陳維崧一派以博麗爲宗其弊也膚廓  
吳綺一派以秀潤爲宗其弊也甜熟章藻功一派

以工切細巧爲宗其弊也刻鏤纖小齊齋欲矯三家之失故所作以氣格排鼻色澤斑駁爲宗以自拔於蹊徑而斧痕則尙未渾化也

嬾真初集詩選八卷

江蘇巡撫採進本

國朝張用天撰用天字用六號誠庵婁縣人是集刻於乾隆甲子有用天自序其詩氣體勻整而捶字往往未堅句法亦多沿襲如板橋吟中紅歸水上桃花簇青入烟中柳葉齊則直點竄杜甫句矣

燕川集六卷

江蘇巡撫採進本

國朝范泰恒撰泰恒字無厓河內人乾隆乙丑進士  
改庶吉士外補崇義縣知縣此集皆其所爲古文  
後附其祖父墓表祖母壽序皆他人作而末又綴  
以泰恒代文六篇編次不倫疑墓表壽序卽泰恒  
自作嫁名於人後仍收之集中耳然究非體例也  
敝帚集二卷附蘆中集一卷

國子監助教張  
義年家藏本

國朝趙秉忠撰秉忠字景光號秋墅乾隆乙丑進士  
改庶吉士未散館而卒是集皆古今體詩末附蘆  
中集乃吳其子春祈而作也

凝齋遺集八卷

江西巡撫  
採進本

國朝陳道撰道字紹洙號凝齋江西新城人乾隆戊辰進士是集爲其子守誠等所刊凡文六卷詩二卷中頗多講學之作

柘坡居士集十二卷

浙江巡撫  
採進本

國朝萬光泰撰光泰字循初秀水人乾隆庚午舉人是集其所自定卷一曰南邨草堂集卷二曰藥子集卷三卷四曰聞漁閣集卷五曰北郭草堂集卷六卷七曰江船集卷八曰聞漁閣續集卷九曰觚

屋集卷十曰江船續集卷十一曰五上春司集卷  
十二曰青乳軒集前有汪孟錫序稱循初計偕北  
上以病卒方病中舊自定詩十二卷一緘寄余有  
可存則付令子存之不者燬之之說又稱刻既成  
取循初別字題曰柘坡居士集其古文詩餘極夥  
聞手自燬去外雜著十六種則皆其自定緘寄者  
俟他日續刻云云蓋光泰才思富贍篇什頗多後  
乃悔其少作所存止此也

浩波遺集三卷

庶吉士梁上  
國家藏本

國朝鄭際熙撰際熙字大純侯官人乾隆丙子舉人  
年三十六而卒是集爲其弟際唐等所刊凡詩二  
卷文一卷文中有杜律篇法序一篇稱能詩者未  
嘗先言法而自中法且神而明之變化以自成其  
法未有按一定之科條而譜之舍其性情才力俯  
首以從法也其論亦足破拘攣之說其書則未之  
見也

觀光集五卷

浙江巡撫  
採進本

國朝蔡以封撰以封字桐川嘉善人由優貢生官桐

鄉訓導是集凡古今體詩八十五首擬樂府四十  
六首皆其監敷文書院恭逢

聖駕南巡率諸生迎

駕時所賦也

綠杉野屋集四卷

浙江巡撫  
採進本

國朝徐以泰撰以泰字陶尊德清人國子監生乾隆  
二十二年官陽曲縣知縣其詩皆早年之作故骨  
格未就而時有雋句如詠鷹翎扇附人終在手斷  
翮尙生風一聯亦頗工點染也

強恕齋文鈔五卷

浙江巡撫  
採進本

國朝張庚撰庚有通鑑綱目釋地糾繆已著錄庚少孤貧賣畫養母以餘力爲古文是集乃其七十三歲所自編中傳誌之文居十之七多述忠孝節義之事

冬心集四卷

江蘇巡撫  
採進本

國朝金農撰農字壽門錢塘人客於揚州書畫皆以奇逸自喜詩亦如之其名冬心者取崔國輔寂寥抱冬心之語也

產鶴亭詩集七卷

浙江巡撫  
採進本

國朝曹庭棟撰庭棟有易準已著錄是集凡分七藁  
每藁各爲小序其書齋中有產鶴亭因以名集故  
集中詠鶴詩最多其第二藁別題曰魏塘紀勝第  
七藁亦別題曰續魏塘紀勝蓋嘉善舊隸嘉興路  
爲魏塘鎮亦名武塘明宣德五年始析爲縣庭棟  
先咏其名迹爲一百首又續成五十首也

西澗草堂集四卷

編修周永  
年家藏本

國朝閻循觀撰循觀有尙書續記已著錄是編其所

著古文也其文謹嚴頗不苟作循觀歿後其同學  
韓夢周爲搜輯編次序而刊之僅五十七篇

巖嶧山人集八卷

禮部主事任  
大椿家藏本

國朝汪舸撰舸字可舟婺源人流寓揚州性不諧物  
偃蹇貧病以歿是集爲舸所自定斷自五十歲以  
後乾隆庚寅杭世駿爲之序併附錄世駿與沈沃  
田詩盛稱其和丁隱君貝葉經歌長春觀老子像  
絕句云

曉巢集六卷後集一卷

江西巡撫  
採進本

國朝李鏞撰鏞有尚史已著錄鏞卜居盤山優游泉石以終故其詩意思蕭散挺然拔俗大都有古松奇石之態而刻意求高務思擺脫亦往往有剗削骨立斧鑿留痕較王世貞所謂高叔嗣詩如空山鼓琴沉思忽往木葉盡脫石氣自青者則猶有一間之未達蓋可以著力之處精思者得之不容著力之處精思者反失之也第一卷皆擬古樂府古人音節既不可得乃詰屈其詞以意爲之題下所注如朱礪下注曰建鼓殷所作棲翔鸞於上或曰

鷺鼓精此吳競解題本說也臨高臺下注曰趨帝鄉而會瑤臺也借寓游仙已非原解雉子斑下注曰關雎之類則純非古題之意又不知其寓意所在卷中大抵類此殊不可解也

石閭詩一卷

江西巡撫  
採進本

國朝陳景元撰景元號石閭鑲紅旗漢軍生平作字效晉作詩效漢務欲自拔於流俗之上是集乃其手書擬古詩六十餘首以貽雷鉉者前有短札亦其手書鉉並鉤摹筆迹刻之紙板頗爲精好景元

詩雖以漢爲宗而性既孤僻思復刻峭結習所近  
乃在孟郊賈島之間如米摹晉帖矩度不失二王  
波勒鉤剔乃時時露其本法於漢人不彫不琢之  
意未能全似也此本以篇頁較少不能成帙舊附  
於李錯隄集集以行然二人同時倡和名亦相齊  
未可列諸附綴故仍各著於錄焉

南阜山人詩集七卷

山東巡撫  
採進本

國朝高鳳翰撰鳳翰字西園晚自號南阜山人又曰  
歸雲老人膠州人嘗以縣丞署鹽大使患風痺罷

歸卒鳳翰工於書畫筆墨脫洒不主故常風痺後  
右臂已廢乃以左臂揮洒益疎野有天趣間作詩  
歌不甚研鍊往往類唐自放亦不甚局於繩尺然  
夫分絕高興之所至亦時有清詞麗句故少時以  
詩謁王士禎極稱賞之生平所作凡三千餘首曰  
擊林集曰湖海集曰岫雲集曰鴻雪集曰歸雲集  
曰歸雲續集曰青蓮集晚年貧病且死自跋其後  
曰盲子頑孫篋笥誰付不知後來所作尙復幾許  
亦不知得成卷與冊否尙有人拾取於蛛絲蠹腹

之餘以少得流傳於人世否露電茫茫老病日篤  
死且不知何時而猶惓惓於此故紙窠中物愚哉  
南阜不直達人一笑矣其志亦可哀也

拙齋集一卷

編修周永年家藏本

國朝李遠撰遠字君宏益都人是集皆五七言近體  
吐屬亦頗恬雅其刊板字畫悉從說文以小篆改  
隸詭形怪態則殊爲好異

密娛齋詩稿一卷

編修周永年家藏本

國朝鄧汝功撰汝功字謙持聊城人乾隆乙未進士

傳臚後卽病歸未及釋褐而卒是集乃其友桂林府同知李文藻所刊文藻序稱其古體出於韓蘇近體似錢郎皆非止境蓋其天分頗高而得年不永功候則尙未成就云

放鶴村文集五卷

山東巡撫採進本

國朝張侗撰侗字同人一字石民諸城人是集前有方邁所作侗小傳稱其有孝行多奇節蓋亦孤高之士其文則欲擺脫叮咛乙乙冥冥別標象外之趣而反墮公安竟陵派中蓋存一不落窠臼之意

卽其窠曰矣

東坪集八卷

浙江巡撫  
採進本

國朝胡慶豫撰慶豫字雝來號東坪平湖人歲貢生  
是集卷一曰南浦吟客江右時所作卷二曰昭陽  
小豪客邗江時所作卷三曰北征集赴京道中及  
寓京師時所作卷四卷五曰西征草入關中及流  
寓西蜀時所作卷六卷七卷八曰桐軒集則里居  
所作也其詩以雅淡爲宗而未能超詣

六湖遺集十二卷

浙江巡撫  
採進本

國朝張文瑞撰文瑞字雲表六湖其號也蕭山人官  
青州府同知其詩凡分十八集其私印曰少陵私  
淑又曰五言長城自命頗高所作則大抵以秀潤  
爲工

念西堂詩集八卷

陝西巡撫  
採進本

國朝王令撰令字仲錫渭南人由拔貢生官至廣東  
按察使是編分金石絲竹匏土革木八集自序謂  
皆適性自樂之言蓋沿波鍾譚全非慶陽武功以  
來秦中舊格矣

古雪堂文集十九卷

浙江巡撫  
採進本

國朝王令撰是編乃其所著雜文詞多蹇澁似沿其鄉文翔鳳餘派又好用釋典頗雜宗門語錄所作詩話如紀隴西施妙玉在冥中代高素臣作詩還魂遂爲夫婦事亦多類唐人說部也

有蘭書屋存稿四卷

江蘇周厚  
堉家藏本

國朝石球撰球字鳴虞嘉定人其近體詩頗有風致而骨格未堅徐樹紳序稱球自以生平踪迹少所涉歷無瑰偉奇特之觀故亦罕沉博絕麗之作可

謂自知矣

寒玉屏集二卷碎金集二卷

浙江巡撫採進本

國朝閔南仲撰南仲字湘人號石漁湖州人其詩以新穎爲宗體格頗近金元

薪樞集四卷

江蘇巡撫採進本

國朝許昌國撰昌國字仔麋原字一清荆溪人歲貢生是書首雜著次論學次論古次課徒訓兒各爲一卷大抵皆語錄之類後集一卷則附錄也末有其子重炎所作年譜按其事狀蓋亦篤行好修之

士故集中講學之語多能切實近理特不以著作見長耳

璞堂文鈔十一卷

江蘇巡撫採進本

國朝許重炎撰重炎字少來荆溪人是集多講學之文而持論平允無喧爭門戶之習於忠孝節義尤矚矚表章亦非空談性命自號聖賢者流文則縱橫曼衍惟意所如不能一一入格也

禹門集四卷

內府藏本

國朝郭振遐撰振遐字中洲汾陽人寄居揚州詩頗

率易至以大禹顏回自比尤爲狂縱矣

彙書六卷

浙江巡撫採進本

國朝王鳳九撰鳳九仙遊人是集自序謂放笠澤叢書之例故以彙書名之中多講易之文其說皆宗程朱詩則有韻語錄也

天門詩集六卷文集六卷

內府藏本

國朝吳盛藻撰盛藻字觀莊和州人由拔貢生官至廣東按察司副使其詩文皆惟意所如罄所欲言而止

歲寒堂存稿一卷

浙江巡撫  
採進本

國朝林璐撰璐字鹿菴錢塘人是集皆其所著雜文  
僅數十篇相其板式蓋陸續開雕尙未編定成帙  
其安溪懷古序信建文出亡爲真殊爲未考所記  
顏允紹郭少尹等事皆足裨史之缺特敘述稍冗  
筆力稍弱耳

天香閣詩集十卷

浙江巡撫  
採進本

國朝唐之鳳撰之鳳字武曾烏程人其詩多愁苦之  
音擬古諸作亦頗具體然未能變化末附碎玉合

編二卷一題唐雲槓子霖著一題唐德遠深源著

葢之鳳兄弟行也

笑門詩集二十五卷

內府藏本

國朝戚珏撰珏字後升泗州人由優貢授知縣所作  
好爲新語葢公安竟陵之流派

偶存草詩集六卷

山東巡撫採進本

國朝林之蘅撰之蘅字素園楊夢琬序稱其產於魯  
客於楚其自署曰孝感葢寓籍也其取法在中唐  
南宋之間而學力則未逮焉

右別集類一千五百六十七部一萬七千六百十四

卷

內六十六部無卷數

皆附存目